

uniud

## UNIVERSITAT

Il furlan al viaze  
cu la coriere

**O**CJO AL FURLAN su lis stradis de regjon. La campagne di promovion de marilenghe, pensade dal Centri interdepartimentâl di ricercje su la culture e la lenghe dal Friûl (Cirf) de Universitât dal Friûl, si sierarà cuntun viaç in coriere fintremai ae metât di Lui, tra lis provinciis di Udin, Gurize e Pordenon.

Cuatri autobus di fûr vie urbans, doi che a partissin de stazion di Udin, un di chê di Gurize e un di chê di Pordenon, a ziraran di fat pal Friûl-Vignesie Julie, metint fûr cartei cu la formule «F=MC2 Furlan mieç di comunicazion al cuadrât».

La scree de campagne di promovion de marilenghe e je scomençade dal prin di Novembar dal 2006 cun spots pubblicitariis trasmetûts tes salis cinematografichis plui grandis de regjon, ma ancje in grazie di messaçs pe radio, di publicacions su giornâi specifics e su la cjarte stampade, e cu la distribuzion di cartulinis e di segne-libris, adesifs e manifescj.

La formule F=MC2, che e ven di chê di Einstein E=MC2, e rimarche l'aspjet inovatîf dal doprâ il furlan tant che lengaç scientific, tecnologjic e filosofic. Il studi, la ricercje continue, li s publicacions dal setôr, come cualchi riviste scientifiche in lenghe furlane, e il fat di vê prontât imprescj linguistics specifics «a àn contribuît – e conte Piera Rizzolatti, direttore dal Cirf – al procès di insiorament continui e di evoluzion dal furlan». La lenghe furlane e à vuê la pussibilitât di rapresentâ ad implen la realtât e di afrontâ nivei alts e diversificâts di comunicazion, e la discuvierde di cheste gnove formule F=MC2, e je un ricognossiment des potenzialitâts concretis di cheste lenghe. I materiâi si distribuissin al Cirf ([www.uniud.it/cirf](http://www.uniud.it/cirf)), li de Universitât, in vie Petracco 6, a Udin. Inte stesse sede si pues usufruî dai servizis dal Sportel di lenghe furlane, che si pues contatâ ancje al numar 0432 5564580 o pûr vie e-mail ([cirf@uniud.it](mailto:cirf@uniud.it)).